

欽定縣事宜

同治戊辰首夏
江蘇書局重刊

道光十六年十一月十五日內閣奉

上諭申啟賢奏恭摺

御製人臣儆心錄

欽定訓飭州縣規條頒布通省官員一摺所見甚是州縣爲親民之官果能各盡其職則天下自無不治膺是職者宜如何精白乃心勤求吏治以副朕愛養元元之至意若如該撫所奏州縣蒞任之始不問地方之利病先問缺分之肥瘠凡前人所不敢存諸寤寐者今則直言諸大庭廣眾之中而無忤容一切公事委之幕友任之書役以致營私作僞徇利曠官積習相沿恬不爲怪夫吏治之廢弛全在該管各大員設

法化導多方振作使知奮愧思勉自可力挽頽風該
撫槩刻書函俾各該州縣實力講求湔除錮習洵爲
正本清源之論著照所奏辦理因思晉省地方吏治
如此各直省想亦不免所有雍正八年

欽定訓飭州縣規條一書其中條列州縣事宜允爲牧
令法守著各該督撫卽遵照原書敬謹槩刻頒發所
屬各該州縣俾得細心究習實力奉行有所據依以
爲準則倘有陽奉陰違執迷不悟者卽著該督撫據
實參劾毋得稍事姑容務使民咸樂業比戶可封大
法小廉吏治蒸蒸日上朕實有厚望焉將此通諭知
之欽此

欽定訓飭州縣規條

世宗憲皇帝諭旨

奉

上諭牧令爲親民之官一人之賢否關係萬姓之休戚故自古以來慎重其選而朕之廣攬旁求訓勉告誡冀其奏循良之績以惠我蒸黎者亦備極苦衷矣惟是地方事務皆發端於州縣頭緒紛繁情偽百出而膺斯任者類皆初登仕籍之人未練習於平時而欲措施於一旦無怪乎徬徨瞻顧心志茫然卽採訪咨詢而告之者未必其盡言無隱此古人所以有學製美錦之歎也向以大學士朱軾左都御史沈近思外

任多年周知地方利弊雍正二年曾令二臣商酌規則以爲州縣之南車乃書未就緒而沈近思物故邇年以來朱軾復時多病此事遂至遲延去年始降旨委諸總督田文鏡李衛今二臣各據所見繕錄諸條以進朕親加披覽見其條理詳明言詞剴切民情吏習罔不兼該大綱細目莫不備舉誠新進之津梁庶官之模範也在二臣各就其所閱歷者而言繁簡同異之閒不必一致而慎守官方勤恤民隱興利除害易俗移風其大指則一而已矣爰就本文付之剞劂頒賜州縣官各一帙俾置之几案閒朝夕觀覽省察提撕治效未臻必思所以勉之弊端未革必思所以

去之本之以實心行之以實力毋始勤而終怠毋靜
言而庸違如此則不但國家得司牧之賢草野有父
母之頌而爾等身膺顯擢叨被榮光福貽子孫名標
史冊豈不美歟特諭

雍正八年三月初四日

河東總督臣田文鏡欽遵

聖諭條列州縣事宜目錄

到任

交盤

關防

宣講

聖諭律條

放告

催科

借糶倉穀

弭盜

驗傷

聽斷

堂事

防胥吏

慎延幕賓

待紳士

免行戶

謹差下鄉

勸農桑

嚴禁獄

講讀律例

操守

河東總督臣田文鏡欽遵

聖諭條列州縣事宜

到任

州縣初膺民社通籍仕版上爲

聖天子撫字元元加惠地方致身事

君始基之矣正宜崇簡持約飭官方勵操守以圖遠大
建白當時無如俗吏多以到任爲榮而奸胥喜
以鋪墊爲事衙門則必重爲修飾轎傘則必另
製新鮮甚至氈絲圍屏務求華麗卓几燈燭不
厭碎煩在長官釋褐方新揚揚入署視爲衙門
舊例快意當前而不知派累行戶苛斂里民追

呼悉索已費中人之產矣其實備辦供官者不過十之二三而侵蝕分肥者已踰十之七八是民爲魚肉官爲唇齒恣意大嚼乃供羣蠹之飽俾其捫腹匿笑豈不愚哉況先聲狼藉民口難防一遇鐵面之上司則朝垂黃綬而夕登白簡亦又可惜也故於未到任之先必須嚴切發諭禁止鋪墊務要稜稜錚錚說得咬釘嚼鐵則伊等捧檄而讀便已心懷此官具有風力不敢擅自派斂然非徒託諸空言也到任之後青氊原有故物環堵且自蕭然地方之一絲一粟一物一器不但不取並不借臨時需用發價平買

吏既不能爲奸民亦無從滋擾新政精明人歌
來暮矣但胥役巧猾小民愚懦保無有陽奉陰
違藉名暗詐者乎此又在畱心密訪遇有發覺
者倍法以懲慎勿令若輩當面賣卻也

交盤

州縣到任交盤乃第一要務蓋今日之受於人
者卽異日之交於人者也苟不慎之於始鮮不
貽累於後雖不可刻薄居心過於苛求尤不可
徇情濫接代人受過虧足務得其實鉅細務得
其詳清查之法不可不知也如地丁錢糧則應
查其全書額編實徵銀數按前官到任離任月

日任內徵收過若干解支過各若干應存庫銀若干未完民欠若干分年分款先清其綱領將應存庫銀卽按款照數兌交其徵收數目又必驗其串根流水核其日報總簿而串根流水報簿尙有假捏改造徵多報少之弊其解支款項又必照驗其批迴稽查其領狀而領狀批迴尙有洗補年月改換銀數之弊均當細察然有批領未交而前官稱係解過某項支過某項者則當詳明所解衙門查明所領員役果非虛捏方可憑信至於民欠清釐尤難官侵役蝕多暗藏於民欠之中新任之員第知責成於經管錢糧

之總吏庫吏經承櫃書取其並無捏欠願甘賠
補之結狀不知此輩或受前官賄囑或係己身
侵蝕通同徇隱彼此欺瞞結狀實爲具文是在
責令經承櫃書開造花名細冊先查某年民欠
總數次查某里某甲民欠細數然後將花戶姓
名欠銀數目大張告示曉諭通知有以完作欠
以少作多令本戶告理更須出其不意摘拘完
納查詢虛實一有弊端卽窮究到底官侵則據
實揭報役蝕則立卽監追務使戶戶無虛釐釐
著實不但己身無賠累之虞卽小民亦免重納
之累此清查民欠尤爲交盤中第一要著也若

夫倉儲米穀顆粒爲重從前州縣多用量倉之法用杆丈量約略算交其中有無虧缺霉爛不能確知今倉糧交盤已按米穀之多寡定限期之遲速自當徹底盤量如有虧空短少霉爛糠粃卽據實揭報其有前官私糶未補折價畱交者斷不可違例接收至奉文平糶雖非前官私動然須察其實在糶賣之數催交價銀儲庫惟民借一項其弊多端有本係虧空乘奉文出借以少報多捏混掩飾者有遠年民欠改換領狀以舊作新者有奸胥蠹役侵收冒領混入民欠者尤不可草率誤徵必須詳細查察如查錢糧

民欠之法開造花名細冊另取欠戶領狀以杜諸弊他如水旱驛遞船隻則查其是否齊全整備馬匹則查其有無疲瘦缺少

農壇藉田忠節祠宇倉廩城垣則查有無坍塌此外或有前官經修工程經手錢糧又當隨事察覈不可使有纖悉遺漏然此皆就關係錢穀者而言至於

欽部事件命盜重情承審遲延失察諱匿接任官均有處分亦何可以刑名不入交盤而姑置勿論也總之前官之事一交卸於後官卽爲後官之肩承欲免後累而盡職守則授受之際不可不慎